

Uunga siunnersuut: Meeraq qiteralugu, meeqqallu isumannaatsuunissaa qiteralugu angajoqqaat akisussaanerat pillugu inatsimmik oqaasertalersuinissaq pillugu apeqquteqaat aallaavigalugu oqallinnissamik siunnersuut.
(Inatsisartuni ilaasortaq Astrid Fleischer Rex, Demokraatit)

Akissuteqaat
(Naalakkersuisut Siulittaasuat)

Naalakkersuisut aallarniutigalugu apeqquteqaat aallaavigalugu oqallinnissamik siunnersuummut, suliaasaqarfimmik pingaarutilimmik samminnittumut qujassuteqarusupput.

Naalakkersuisut isumaqatigaat, meeraq qitiutinneqassasoq. Meeqqanut inuusuttunullu akisussaaffik tamatsinniippoq, inersimasullu tamarmik ataatsimut meeqqanik inuusuttunillu akisussaaffiginninnissaat pingaaruteqarpoq. Meerartavut inuusuttortavullu tassaapput nunatta siunissai isumalluutissatsitullu pingaarnerpaat.

Meeqqat inuusuttullu pillugit suliaasaqarfik ilaqutariit pillugit inatsiseqarnerup iluaniippoq, taamaattumillu inatsisit tungaasigut suliaasat danskit Folketingianit suliarineqartarput. Taamaattumik angajoqqaat akisussaanerat pillugu inatsisiliortoqassappat, inatsit tassaassaaq danskit inatsisaat Kalaallit Nunaannut atortuulersitaq.

Meeqqat inuusuttullu pisinnaatitaaffii ullumikkut meeqqat inatsisitigut qanoq inissisimanerat pillugu Kalaallit Nunaannut inatsimmi malittarisassaliunneqarsimapput. Taassuma saniatigut Kalaallit Nunaata Naalagaaffiit Peqatigiit Meeqqat Pisinnaatitaaffii pillugit Isumaqatigiissut atuutilersinnikuuaa. Meeqqanik inuusuttunillu ikiorsiisarneq pillugu Inatsisartut peqqussutaatigut Naalakkersuisut Naalagaaffiit Peqatigiit Isumaqatigiissutaatigut Naalagaaffiit Peqatigiit Meeqqat pillugit Ataatsimiititaliaanut danskit naalagaaffiata nalunaarutaanut ilanngussisussaataapput. Taamaasilluni ullumikkut meeqqat inuusuttullu pisinnaatitaaffii pillugit malittarisassaqaareerpoq. Ullumikkut meeqqat inatsisitigut inissisimanerat pillugu inatsisip angajoqqaat meeqqaminnik perorsaanissaannut, pilersuinissaannut ilinniagaqarnissaannullu pisussaaffilerpai.

Naalagaaffiit Peqatigiit Meeqqat Pisinnaatitaaffii pillugit Isumaqatigiissutaata meeqqat illersugaanissaat isumassorneqarnissaallu, angajoqqaat marluullutik meeqqap perorsarnissaanut ineriartortinnissaanullu akisussaaffeqarnerat, meeqqap qitiutinnissaa isumaginninnikkullu isumannaatsuunissaa qulakkeerpai.

Siunnersuuteqartoq allappoq, angajoqqaat akisussaanerat pillugu inatsisit angajoqqaat meeqqat toqqissisimasumik peroriartornissaat, najugaqarnissaat, eqqortumik nerisassaqaarnissaat atisaqaarnissaallu kiisalu atuarnerminni tapersorneqaarnissaat inatsimmiissasoq. Pineqartut danskit angajoqqaat akisussaaffeqarnerannut inatsimmi malittarisassaqaanngillat. Paarlattuanilli pineqartut pillugit meeqqat inatsisitigut inissisimaneranni maanna atuuttumi malittarisassaqaarpoq. Naalakkersuisut allasimasut naapertorlugit paasinninnerat naapertorlugu siunnersuuteqartoq isumaqarpoq, meeqqat

inatsisitigut inissisimaneranni meeqqat pisinnaatitaaffii pillugit inatsisip maanna atuuttup naleqqussarneqarnissaa pisariaqartinneqartoq.

Piffissami matumani Danmarkimi kalaallit ilaqutariit pillugit inatsisit nutarterneqarput, tassunga ilanngullugit meeqqat inatsisitigut inissisimanerat pillugu inatsit aamma angajoqqaat akisussaanerit pillugu inatsisip atortuulersinneqarnera. Taamaattumik angajoqqaat akisussaanerit pillugu inatsisip kiisalu meeqqat pisinnaatitaaffii pillugit malittarisassat oqaasertalersornerannik suliaqarneq aallartereerpoq.

Pisortat akisussaaffeqarnerat aamma angajoqqaarsiat pillugit malittarisassat isumaginninnermi inatsisiniipput, taamaattumik nammineerluta nunatsinni malittarisassanik taakkununga tunngasunik aalajangersaasinnaavugut.

Ullumikkut meeqqanik inuusuttunillu ikiorsiisarneq pillugu Inatsisartut peqqussutaat pioreerpoq. Inatsisartut peqqussutaanni tassani kommunalbestyrelsit meeqqat inuusuttullu peroriartorneranni meeqqat inuusuttullu ineriartornerannik, atugarissaarnerannik nammineeranerannillu atugassaqartinneqarnissaannik pisussaaffiligaapput. Taakkua saniatigut aalajangersarneqarsimavoq, siusissukkut meeqqanut inuusuttunullu timikkut tarnikkullu piginnaasakitsunut imaluunniit immikkut ittumik pisariaqartitsisunut iliuseqartussaataaneq. Inatsisartut peqqussutaat taanna taakkua saniatigut aamma ikiorsiissutit pillugit malittarisassanik imaqarpoq, taakkununga ilaavoq angajoqqaarsiat pillugit malittarisassat.

Taakkua saniatigut Inatsisartut peqqussutaata meeqqat atuarfiannut tunngatillugu angajoqqaat meeqqamik atuartaatitaanerannik naammassinninnissaannik pisussaaffilerpai.

Meeqqat inuusuttullu pillugit inatsisini iluarsartuuteqqinneqartussani Naalackersuisut eqqumaffigisorujussuuaat, meeqqat inuusuttullu toqqissisimasumik meeraanissaminnut periarfissaqarnissaannut tunngatillugu ilaatigut angajoqqaarsiat pillugit siusissukkullu iliuseqarnissamut aalajangersakkat itisilerneqarnissaat. Tunngaviusumik aallaavik tassaassaaq, meeqqap qitiutinneqarnera. Inatsisunik iluarsartuusseqqinnermi attuumassuteqartut tamarmik ilanngunneqassapput UNICEF-imillu suleqateqarneq tassunga ilaatigut aamma ilaatinneqassaaq. Naalackersuisut naatsorsuutigaat, meeqqanik inuusuttunillu ikiorsiisarneq pillugu Inatsisartut peqqussutaata ataatsimut nutartikkap 2012-imi saqummiunneqarnissaa.